

ՈՉ ՎԵՐՁԻՆ ԵՎ ՈՉ ԱՎԵԼՈՐԴ ԼՈՒՄԱՆ

Սկսած 1996 թվականից՝ «Հայաստան» համահայկական հիմնադրամը անցկացնում է հեռուստամարաթոններ: Դրանք տեղի են ունենում Լոս Անջելեսում՝ յուրաքանչյուր տարվա նոյեմբեր ամսին: 12-ժամյա հեռուստամարաթոնների կազմակերպումը ոչ թե սոսկ դրամահավաքին ուղղված միջոցառում է, այլ հայությունը մեկ միասնական նպատակի շուրջ համախմբող լայնածավալ ձեռնարկ:

Վերջին տարիներին հիմնադրամը հաջողությամբ իրականացնում է «Արցախի վերածնունդ» ծրագիրը: Այն կոչված է լրջորեն խթանելու Լեռնային Ղարաբաղի տնտեսական վերելքը, ինչպես նաև ժողովրդի բարեկեցության մակարդակի բարձրացումը:

Եվ ինչպես ամեն մարդ իր ծնողի ու զավակի՝ այդպես ամեն հայ պետք է մտածի անցյալի ու ապագայի մասին: Դրա համար պետք է, որ ամեն հայ տա իր ունեցած ոչ ավելորդ եւ ոչ վերջին լուման՝ այդպիսով ջերմեռանդ ինքնապոհողության եւ սառնանտարբերության միջակայքում գտնելով պատասխանատվությունը ծնողի ապրածի ու զավակի ապրելիքի հանդեպ: Հենց սրանից էլ ելնելով՝ ամեն տարի անցկացվող հեռուստամարաթոնին իրենց ավանդն են ներդնում նաև արցախցիները՝ առաջնորդվելով «մենք օգնում ենք մեկ» սկզբունքով: Այս տարի անցկացված հոբելյանական 10-րդ հեռուստամարաթոնին Արցախի մասնակցությունը նախորդներից տարբերվում է մի առանձնակի աշխուժությամբ եւ ոգելորությամբ: Անցյալ տարվա 35 միլիոն դրամի փոխարեն՝ այս տարի արցախցիների ուժերով հանգանակվել է շուրջ 1 միլիոն դոլարին համարժեք գումար, ինչը ռեկորդային է:

Այդ հանգանակության մեջ իր համեստ լուման է ներդրել նաև «Արցախի կանայք» հասարակական կազմակերպությունը՝ հիմնադրամի հաշվին փոխանցելով 30.000 դրամ:

Որպես հայ՝ Հիմնադրամի բոլոր աշխատակիցներին երախտագիտություն ենք հայտնում այն ահռելի աշխատանքի համար, որ նրանք կատարում են հանուն մեր ազգի միավորման ու առաջընթացի: